

գրամս պահպանաց եմուտ առ նա , և որպէս ինքն պատմէ , ետես զի նստեալ նորա առ հրով շղթայ յոտս՝ փոխանակ ջերմանալոյ դողայր յերկիւղէ մահու . և ՚ի տեսանելն զերեմեա՝ ելաց և լացոյց զնա , զի բարձեալ էր ՚ի յուսոյ կենաց . ետ ապա ՚ի ձեռս նորա ծրար մի 500 ոսկւոյ , և զկնիքս իւր զմեծ և զփոքր : Եւ նորա յոյս տուեալ Եղիազարու և մխիթարեալ զնա՝ ել և զնաց անտի , և տարեալ զաւանդան՝ ետ ՚ի ձեռս Ռուհիջանին , որ էր գործակալ Պատրիարքին Երուսաղէմի :

Մնաց Եղիազար յերկաթս զաւուրս 3½ . եւ բարեկամք նորա երթային և գային ՚ի դրունս իշխանաց ծանր ընծայիւք , մինչեւ ձանձրանալ նոցա և ասել , մի՞թէ կարեմք իշխել կամաց Եպարքոսին . համբերեցէք սակաւ մի , և մեք գտցուք ելս իրացդ : Ապա նոքին իսկ իշխանք այլազգեաց յաղաչանս անկեալ հայցէին բազում անգամ յԵպարքոսէն՝ կատարել զխնդիրս Հայոց և հանել զԵղիազար , միանգամայն դարձուցանել ՚ի նոսա և զՍ . Յակոբ որ յԵրուսաղէմ :

Այլ նա ոչ լուաւ , և ՚ի թախանձել նոցա բազմօք , յանձնեաց զիրսն մեծի իշխանին , որ երկրորդ իւր էր ( Վէզիր Բիահեսաի ) . և զի Յոյնք որսացեալ էին զնա ՚ի կամս իւրեանց՝ ՚ի դիմել Հայոց առ նա՝ մերժեաց զնոսա յիւրմէ : Գնացին ասլա Հայք հանդերձ Մարտիրոս վարդապետիւ ՚ի տեղին ուր կայր Եղիազար ՚ի կապանս , և ՚ի խօսիլ նոցա ընդ նմս վասն ազատութեան անձին նորա և վասն Ս . Յակոբայ , ասէ ցնոսա Եղիազար . վասն իմ մի ինչ հոգայք , այլ հոգ ձեր լիցի վասն Ս . Յակոբայ , զի մինչեւ ոչ ազատեսցի այն , ես ոչ կամիմ ելանել աստի : Եւ ապա դրեաց թուղթ առ Մարտիրոս վարդապետ՝ և ասէ՝ որ ոք կամեցի հանել զիս աստի առանց կամելոյ հոգ տանիլ ազատութեան Ս . Յակոբայ , նգովեսցի յԱստուծոյ : Այլ Մարտիրոս վարդապետ ոչ մատուցեալ ունկն բանից նորա , խորհուրդ արար ընդ Հայս , և զնացեալ նոքօք հանդերձ վերստին առ մեծամեծս այլազգեաց , աղաչէր զնոսա , մանաւանդ զհազարապետն զՍիւլէյման Պէյ , միւսանգամ միջնորդել զոնէ վասն ազատութեան Եղիազարու . եւ նոքա հազիւ ուրեմն հաճեցուցեալ զկամս Եպարքոսին առանց իրիք տուգանաց ետուն արձակել զԵղիազար , զոր առեալ Հայոց